

**Serangan di Paris: Perangi ekstremisme dengan kesederhanaan - Najib
Astro Awani
Januari 08, 2015**

KUALA LUMPUR: Perdana Menteri Datuk Seri Najib Tun Razak mengutuk insiden menembak mati 12 orang di [pejabat akhbar satirikal Perancis, Charlie Hebdo](#) pada Rabu.

Dalam satu kenyataan yang dimuat naik di Twitter tengah hari tadi, Najib berkata rakyat harus memerangi ekstremisme dengan kesederhanaan.

"Kita bersatu dalam perpaduan bersama rakyat Perancis," tulis Najib di Twitter.

Sementara itu, Menteri Besar Selangor Mohamed Azmin Ali turut mengutuk insiden yang membunuh 12 kartunis dan anggota polis itu.

"Mereka berkata ia dilakukan atas nama Islam tetapi mereka sebenarnya musuh Islam dan harus dibawa ke muka pengadilan.

"Sekali lagi, kita mesti menekankan bahawa serangan pengganas dan kezaliman semata-mata benar-benar tidak boleh diterima dalam Islam dan kita mengulangi betapa pentingnya keadilan dan kesederhanaan dan menolak segala bentuk keganasan dan fanatik," kata Azmin dalam satu kenyataan.

Parti DAP turut mengutuk serangan kejam itu.

"DAP tegas mengutuk serangan kejam dan ganas itu. Orang yang melakukan pembunuhan tidak berperikemanusiaan harus dibawa ke muka pengadilan dan undang-undang," kata Ahli Parlimen Bukit Bendera Zairil Khir Johari.

Tambahnya, walaupun parti berkenaan tidak bersetuju sepenuhnya dengan kartun di dalam majalah itu tidak ada apa yang boleh mewajarkan penggunaan cara yang ganas dan zalim terhadap pengamal media.

"Kita mesti bersatu menentang segala bentuk ekstremisme," katanya.

Beberapa pemimpin, wakil badan bukan kerajaan dan personaliti tempatan turut berkongsi pendapat mereka tentang insiden tembakan di Paris itu.

Read more at :<http://www.astroawani.com/berita-malaysia/serangan-di-paris-perangi-ekstremisme-dengan-kesederhanaan-najib-51764>